

Embaixadór Japaun selebra Inaugurasaun edifísiu eskola Bulico
iha Suco Ainaro

8 Maiu 2023

Iha loron 8 fulan Maiu tinan 2023, Sr. Tetsuya KIMURA, Embaixador Japaun ba Timor-Leste partisipa iha serimónia inaugurasaun ba edifísiu eskola foun iha Eskola Bulico iha suku Ainaro, Postu Administrativu Ainaro, Munisipiu Ainaro. Serimonia ne'e organiza husi Fundasaun Feto Hadomi Familia (FFHF), ONG lokál ida mak implementa projetu ne'e. S.E. Sr. Armindo Maia, Ministru Edukasaun, Juventude no Despostu, Sr. Levegildo Pereira, Administrador Munisípio Ainaro, ofisiáis governu lokál husi autoridade relevantes, parte interesadas, profesóres, funcionáriu eskola no estudante sira hamutuk ho Embaixador Kimura iha serimónia refere.

Embaixador KIMURA hato'o ninia profunda gratidaun ba comunidade sira iha suku Ainaro no ONG FFHF ne'ebé implementa ona konstrusaun edifísiu eskola ne'e ho kapas tebes: "Ha'u kontente tebes atu hatene katak estudante no profesór sira iha ambiente saneamentu ne'ebé di'ak liu ho instala hariis-fatin ne'ebé mak iha no estudante sira sente konfortavel iha sira nia sala laran ne'ebé mak foun no luan."

Nia mós hatete ba estudante sira "Ha'u sei apresia se imi bele halo eskola foun ne'e moos nafatin. Aprendizajen mak sei hariku imi nia moris no habelar imi nia futuru iha oportunidade sira oin mai. Tau matan uma eskola ne'e moos nafatin mak sei ajuda mos imi nia alin sira ne'ebé tuir mai atu aprende iha futuru."

Ba projetu ne'e, Governu Japaun apoiu osan ho montante \$90,825 (dolar amerikanu rihun sia nulu atus ualu rua-nulu resin lima) liu husi ninia eskema ida ho naran Fundu Asistensia ba Projetu Komunitariu no Seguransa Umana (GGP). Liu husi programa ne'e, suporta konstrui ona edifísiu eskola foun ida ho sala de aulas 3 (tolu) no hariis-fatin sira hodi fó benefísiu ba estudantes hamutuk nain 60 (neen nulu) no profesóres hamutuk nain 3 (tolu) iha Eskola Bulico.

Hahu husi lansamentu projetu dahuluk iha tinan 2000, projetu hamutuk 136 (atus ida tolu nulu resin neen) mak implementa ona liu husi eskema GGP iha Munisipiu 14 (sanulu resin haat) iha teritoriu Timor-Leste tomak. Projetu sira ne'e liu-liu fornese asisténsia ba infraestrutura komunitária sira inklui konstrusaun no

Komunikadu Imprensa

reabilitasaun ba facilidades eskola, postu saude sira no sistema abastesimentu bee
moos hodi responde ba comunidade sira nia nesesidade báziku oioin iha nivel baze
(Remata)

Ba informasaun detallada, Favor kontakta Seksaun Ekonomia Kooperasaun iha Embaixada Japaun,
Dili iha 3323131/2